

督撫奏議卷之三

目錄

查解濟邊銀兩疏

奏報撫臣服闋疏

考覈將領官員疏

報龍安府地震疏

查覆各宗祿糧疏

叅罰管屯官員疏

請給大臣卹典疏



參論不職有司疏
甄別清屯官員疏
參罰徵糧官員疏
查參失獄官員疏
參究稽遲勘合疏

查解濟邊銀兩疏

題爲

國用匱甚經費難支謹遵

明詔謬陳理財肆議以備

采擇事據四川布政使司呈節奉兩院案驗仰司
清查積餘各項錢糧俱作速呈報奉此除即
行各該道轉行各府州縣遵照將歷年所貯
未報紙贖并缺官柴馬等銀及借用支剩各
數目查覆至日另報外今該本司議照當今

之事在裕

國與裕民而已蓋

國用足則邊餉有資民生阜則正供易辦茲二者誠今日之急務也四川地方遠在西陲額徵租稅專備本省與協濟貴州其來遠矣緣內聯粵夷外接達虜徵調之舉無歲無之重以採辦之後未已災傷之稜又至連年以來官民並悴公私告乏未有甚於此時者也有所望時歲豐登帑庫充足一有意外之虞則取

此以助彼借有以濟無庶幾緩急爲備而民生

國計均有賴矣今查閱本司庫貯各項錢糧雖有肆拾餘項內除戶禮工參部料銀安綿建昌各倉本折糧銀

王府本折祿米荒絲價銀腹裏糧銀協濟驛傳鹽稅私鹽變價魚課事例稅契兩院贓罰茶課茶稅魚油水脚富戶南京麁皮

王府民校應

朝水手殷實軍需庫秤祭塋舉人

表夫本司柴馬扣回逃故軍士月糧罰俸官員
俸糧扣除門皂工食扣回蠟價黃冊紙贖單
簾價銀糶穀價銀銅錢價銀空丁公費科場
支剩截解還官糧銀土官罪贖查盤追陪蠟
價等項銀兩多寡不等僅足備支俱無容別
議外松潘威茂各倉本折糧銀豐寧貳倉折
色糧銀布花價銀甲丁庫銀屯糧戶口等銀
雖各有積貯此皆數年以前盈縮之流積非

近來歲入歲出之剩存也如往歲大征九絲
繼剿松番再征建越猺賊馬湖臆夷所用軍
餉及近年採辦大木所用錢糧總之百柒拾
萬兩俱於以上各項銀內通融支撥拮湊
解故得便宜集事不煩別爲求濟而此中尚
有蠲免補支等項不暇細計者及查松茂貳
邊雖有積貯糧銀然計敘南往時建設建武
戍守官兵近來添設建越馬湖防守官兵歲
增糧餉大約用銀伍萬餘兩松潘新設平番

堡主戍官兵歲增糧餉參萬餘兩向來未經
增派止是坐於松茂貳邊前項銀內權宜接
支茲計兩邊積餘之數彼此不滿拾年之供
而拾年用盡寧不加賦乎况今歲更值虜警
調集官兵合用本折糧餉亦取給於此則此
後防秋與前所謂拾年之供果有幾乎此貳
邊糧銀難以擅動昭然著矣又如豐寧貳倉
糧銀較入度出似稍有盈餘但時歲有豐凶
徵輸有完欠或遇停蠲豈能全徵且會省係

藩封重地根本既不可空虛而

宗支漸衍祿養尤不容缺乏前項糧銀亦難輕
動再查鹽課銀歲派參萬陸千柒百肆拾伍
兩柒錢肆分有奇邇年逋欠多至貳千陸柒
百兩不足之數向於以前年分流積數內及
鹽稅與私鹽變價者通融湊足伍萬貳拾伍
兩壹錢起解陝西濟邊今在庫雖有銀壹萬
壹千柒百柒拾貳兩有零即備下年湊解正
數並無餘剩商稅銀坐派所屬州縣徵收除

存留各處支用外無閏該銀壹千捌百柒拾
捌兩肆錢零有閏該銀壹千玖百玖拾伍兩
壹錢零解司湊解陝西濟邊近議每年內除
叁百伍拾柒兩伍錢解部以充協濟昌平州
之數餘俱湊解陝西今在庫雖有銀壹千壹
百陸拾餘兩即係下年湊解濟邊正數又見
貯民兵銀陸拾餘兩係先年流積之數應照
舊存庫備充兵餉其防夫弓兵俱照額數編
給二食並無空役曆日銀先年裁省南京曆

日將紙劄銀伍百兩解部向於殷實銀內動
解至拾肆年內奉文免派訖吏承納銀查得
川省吏承俱係親自供役原無納班銀兩至
於採辦大木本省原無歲派正項大木銀兩
迨至萬曆拾貳年奉文坐採楠杉栢木板枋
共叁千玖百柒拾柒根塊議動司府各項銀
共伍拾玖萬陸千陸百捌拾兩續以木枋價
值計筭該銀伍拾萬壹千貳百陸拾玖兩故
扣回玖萬伍千肆百壹拾壹兩內除支過解

木盤纏使費獎賞及抵補減免銀共壹萬壹千柒百捌拾捌兩捌錢玖分叁釐伍毫仍剩銀捌萬叁千陸百貳拾貳兩壹錢陸釐伍毫并江油縣續解支剩俸糧等項抵充大木銀貳千貳百壹拾陸兩捌錢柒分貳釐貳毫柒絲叁忽伍微柒塵貳纖及銷筭追完各州縣解到還官木價銀壹拾萬柒百陸拾兩伍錢捌分貳釐玖毫陸絲叁忽叁微肆塵共計實在庫銀壹拾捌萬陸千伍百玖拾玖兩伍錢

陸分壹釐柒毫叁絲陸忽玖微壹塵貳纖緣木商應領價值尚未全給借過邊腹糧銀尚未扣還今當動壹萬肆千叁百貳拾兩還松潘壹萬捌千伍百陸拾柒兩柒錢捌分柒釐貳毫玖絲捌微叁纖肆沙捌末還威茂各補所借之數而剩存者壹拾伍萬叁千柒百餘兩近奉撫院批行令將應追木價再加查議則其中不無應蠲豁者而該補木價銀兩又當留備若以借過京料稅課諸項價銀節節

細分一一補足則此壹拾捌萬者猶爲不敷也今計前剩木價銀於內可動壹拾叁萬兩布花銀內動貳萬叁千玖百伍拾陸兩陸錢陸分肆毫壹絲甲丁銀內動貳萬兩屯糧戶口銀內各動壹萬兩此外壹項妖賊田產變價銀肆千肆百玖拾肆兩伍錢伍分玖釐伍毫一項書院地基學田變價銀肆百柒拾肆兩伍錢壹分捌釐叁毫一項查盤丹砂追陪銀叁百伍拾捌兩伍錢壹分伍釐一項清軍

察院贓罰銀一百四十六兩八錢八分五釐五毫九絲一項科院贓罰銀一百五兩九錢五分九釐二毫一項遺存在庫銀四百六十二兩九錢二釐以上共湊足二十萬兩俱堪起解其餘支剩銀兩在木價另項收貯專備補給木價之需在各項價銀分別存留以備地方緩急之用呈乞議

請明示至日將前銀選委的當官員分運解納等因呈詳到臣案照先准戶部咨該戶科都給

事中王繼光等題本部覆議通行各撫按巡鹽屯田等御史備查所屬司府及鹽運司等衙門歷年所貯未報紙贖并借用支剩各數日盡數開報內兩淮兩浙等處各積餘銀兩及四川布政司鹽課尤當限本年內急查應留應解以憑本部酌議又准戶部咨爲查議錢糧以濟時艱事本部題內開咨行各巡撫都御史巡按御史各查所屬缺官柴馬等銀除十四年已徵在官者盡數查解十五年以

後果有災傷蠲免者准其留補外將無災州縣庫貯缺官柴馬俸糧空月齋膳夫銀盡數查明解部濟邊其民壯快手機兵弓兵防夫曆日銀兩除果已減派小民者准其豁免如有因額派相沿照舊徵輸者亦要逐一清查解部以充濟邊之需如果地方有事或災傷調募不妨明白具

奏以憑酌議抵留又准戶部咨爲仰承

明旨敬陳理財未議以備採擇事該陝西道監察

御史馮應鳳等題本部覆議移文四川撫按
衙門將原報採木餘銀一十三萬四千四百
四十餘兩備查實在的數明白具

奏報部差官就近解赴陝西邊鎮以抵年例本
部卽將抵過銀兩扣數截解載入考成於本
年十二月內具

奏又准戶部咨爲再乞

明命特勅當事諸臣亟解餘銀接濟邊儲事本部
題內開移文各巡撫都御史巡按巡鹽各御

史卽行各司府及各鹽運提舉司將節年積
餘堪動銀兩盡數查出勒限起解仍將鹽課
積餘銀兩載入考成四川限十一月內呈馳
解部接濟邊儲又准戶部咨爲清查餘課隱
漏以少佐邊儲事本部題內開通行各省直
撫按官轉行所屬司府州縣如原無稅處不
許妄自起稅生事擾民其見徵商稅要見每
年所徵銀兩若干收貯何處作何支銷有無
隱匿情由應否定爲則例將所收稅銀盡數

解布政司類解本部接濟邊餉每年終巡撫
官將應徵稅銀及司府見在收貯聽解銀兩
造冊咨部如州縣官收多報少聽撫按官訪
實指名叅斥其各司府吏承合行撫按通查
納銀若干作何支銷除公費應用外計剩若
干造冊報部以抵軍餉以上各項於文到之
日限叁月內各造報各應稅未報者有無多
寡若干吏承納班者有無多寡若干應留公
用若干應解濟邊若干俱載入考成依限具

奏等因俱題奉

欽依備咨前來節經案行該司通行遵照逐一清
查去後今據前因覆查各項錢糧數目相同
除各府州縣未報紙贖等銀及無災州縣庫
貯缺官柴馬俸糧空月齋膳夫等銀候查催
至日另行解報外該臣會同巡按四川監察
御史李 議照臣等竊惟

皇上富有四海凡內外諸司所積孰非
皇上之財况值

內帑告虛邊境多事

皇上以財之不足而日憂勞於上計臣苦措之無術而至議括於外當是之時爲人臣者誰不思體

國奉公以仰佐財用之萬一故臣等奉文以來節督該司將一應庫貯錢糧逐項清查據實開報以憑

奏解而原任本司左布政使彭富綜覈甚當將各項帑銀逐一分別應留應解於是得堪動者二十萬兩臣等覆加查議此外皆係歲額正項支用萬萬不可輕動者即有一二流積之餘而川省兵戎歷無虛歲一有征舉動費不貲即如近日松邊報警臣等調兵運餉犒士鼓番除器繕隍諸費一切取給於是未敢少有塵

瀆且此中百蠻繡錯叛服不常狡虜志切窺邊則此後歲歲防胡當與諸邊無異臣懼庫貯流積之金不足支十年之費而且仰給於

內帑也至於採辦不常之後豐凶不齊之年又何可料乎由此言之此二十萬金者自朝廷視之固不能大佐軍興之費而自臣等守土者計之蓋已不勝杞人之憂矣除將前項銀兩分爲三運一面選差的當官員作速解赴陝西布政司交納以便接濟邊餉外理合具

題伏乞

勅下戶部查照將該部額解該鎮銀兩照數抵扣庶事體俱屬省便而國用不無少資矣緣係

國用匱甚經費難支謹遵

明詔謬陳理財四議以備

米擇及節奉

欽依清查錢糧事理未敢擅便爲此具本謹題請
旨

奏報撫臣服闋疏

題為撫臣服闋事據四川布政使司呈奉臣批
據內江縣申稱本縣鄉宦鄧林喬由嘉靖四
十五年進士歷陞都察院右僉都御史巡撫
大同於萬曆十六年七月十四日在任丁憂
具

題回籍扣至十八年十月十三日二十七箇月
服滿例應奏

聞合行申報緣由奉批仰布政司查報奉此該本

司查得本宦丁憂服闋例應起復呈乞會
題等因到臣簿查先據該縣申前事已經批行
該司查報去後今據前因該臣會同巡按四
川監察御史李 議照原任巡撫大同都察
院右僉都御史今服闋鄧林喬昨建牙於雲
塞鎖鑰功高頃讀禮於江鄉甲兵膏富况封
疆告急之會正萬里揚威之時既經服闋理
合具
題恭候

勅下吏部遇有邊方巡撫員缺將鄧林喬會推起
用庶本官之勛樹可竟而地方之安攘攸資
矣緣係撫臣服闋事理為此具本謹具題

知

考覈將領官員疏

題爲考覈將領官員事節准兵部咨爲考選軍
政官員事該本部題先該巡視京營科道官
傳來鵬等條陳一款本部覆議如遇伍年應
考之期預行各該撫按官將所屬大小將領
從公詢試如有貪酷庸懦年老有疾等項不
拘多寡名數會同具

奏議斤如罪惡未甚年力堪以策勵者不得苛
求等因已經題奉

欽依欽遵在卷今照考期伊邇仍應通行各撫按衙門將所屬大小將領都司等官查照近題事理用心詢試如有前項不職者不拘名數多寡會同劾

奏議斥等因又准本部咨該本部題內開總兵副總兵但係都督職銜者許令自陳副叅遊守原係都指揮使以下等官聽撫按衙門從公詢試一體考覈具

奏議斥等因俱題奉

欽依備次前來欽遵查照今該臣會同巡按四川

監察御史李

查得四川將領各官除陞

遷離任并鎮守總兵史綱係都督職銜應該自陳及松潘東路小河南路豐茂各遊擊將軍平番雅黎各守備雖經推補俱未到任龍安叅將郭成頃該臣具疏叅論外見任分守四川松潘叅將管副總兵事署都指揮僉事朱文達提督敘瀘壩底及貴州迤西左叅將署都指揮僉事曹希彬協守松潘南路威茂

右叅將都指揮同知邊之垣督撫標下遊擊
將軍都指揮僉事萬鏊四川都司掌印署都
指揮僉事阮維藩僉書署都指揮僉事田中
科行都司掌印署都指揮僉事吳光宇僉書
署都指揮僉事司懋官王之翰守備漳臘以
都指揮體統行事署指揮孔憲卿守備石泉
壩底以都指揮體統行事指揮范希正守備
敘瀘以都指揮體統行事指揮徐兆麒守備
寧越以都指揮體統行事指揮李宗望總兵

標下坐營以都指揮體統行事署指揮徐中
武以上各官雖才具未必盡同而職司均屬
無曠况今邊烽時警需才正殷俱應存留以
期得學及考得守備會鹽以都指揮體統行
事署指揮張可大狀貌鹵莽才識卑汙力既
歉於挽強心尤昏於借筋本是千夫長而加
揮使蓋以入貲未聞一日勞而守要邊正宜
策勵顧終日惟恣沉湎何以彈壓夷方一味
止計充囊未免取侮羣小閔城閱標則索常

例銀或貳拾兩或叁拾兩過度者指揮俞寵也巡關巡堡則索拜見錢或銀貳拾兩或硝銅值肆拾兩送入者舍人李池也前官楊師旦業以貪庸斥去而仍用其壞法班頭若郭良位高宗富及孟彩等不下一二十人任狐兔之縱橫柴州夷酋素稱桀驁難制而復詐其磕頭見面若糯大阿勺及自添瑞等約計柒拾餘金信苞直之公入商民黃嘉新被夷賊黑他劫搶率百戶張光祖追捕是矣而乃

不求真賊故將村夷喇喇阿查等抄掠牛拾捌頭羊拾伍隻馬貳匹是何其禦暴而爲暴也土夷哈俄被賊酋者過劫殺差軍人趙懷九撫諭宜矣而反令者過躲避更詐伊同夥阿得阿大等銀陸拾兩牛羊各拾隻馬捌匹不幾於攻夷而類夷乎往鹽井衛則掌印張垣管捕鄧文共餽銀伍拾兩結爲腹心過迷易所則千戶賢承爵百戶龔繼恩各送銀貳拾兩視爲奇貨他若濫受詞多罰贖致生員

凌辱而不辭科紙劄取心紅騰倉攢怨謗而
莫恤此壹官者職守全虧備禦無策軍士與
同猫鼠地方視若贅疣所當亟行罷斥者也
伏乞

皇上念疆場有事之時武流分閫之重

勅下兵部再加查議上

請將朱文達等照舊留用張可大革職回衛庶激
勸行而士心思奮予奪當而積帥知懲矣緣
係考覈將領官員事理未敢擅便爲此具本

謹題請

旨

報龍安府地震疏

題爲地震事據四川按察司管理軍驛屯鹽茶
水帶管威茂兵備道副使陳文煥呈據茂州
申稱萬曆拾捌年玖月貳拾捌日未時地震
自東北而來西南而去略震有聲又據龍安
府申稱本年玖月貳拾捌日申時地震自西
北震向東南顛搖一刻即止各等因到臣該
臣會同巡按四川監察御史李 議照地
道主靜動則失常變不虛生惟其所召今茂

川龍安在蜀西北忽爾震動是臣等奉職無
狀之所致也况頃者傳報虜警二地正屬戒
嚴復值茲異益切悚惶除臣等督行所屬司
府州縣衛所等衙門諭令大小官員痛加脩
省勤職業以弭首災并申飭各邊兵備將領
等官萬分隄備毋致疎虞外緣係地震事理
爲此具本謹具題

知

查覆各宗祿糧疏

題爲遵奉議覆藩政竭愚衷以裨治安事據四
川布政使司呈奉兩院案驗前事該本司查
得先年刊刻賦役書冊事規一

蜀府并

郡王本色祿米於廣備倉關支其鎮國輔國將
軍等位本色祿米坐派各州縣者俱於豐寧
貳倉上納每年春冬貳季例於貳倉關支實
米其夏秋貳季於本司庫貯貳倉折色糧銀

內支給一折支條鈔

郡王將軍中尉儀賓折色祿米每石折鈔二十貫每十貫折銀三分每年分爲兩次長史司呈司關支一房屋銀

郡王鎮輔奉國將軍郡縣主郡縣鄉君例定銀兩數目俱於茶稅銀內動支一

蜀府修造墳塋議定軍民夫匠共四千八百名軍三民七取用軍衛夫匠一千四百四十名另行都司取用有司夫匠三千三百六十名

以一年爲率分別夫匠徵銀不等共該銀三萬七千一百五十二兩解司轉發工所雇倩夫匠修造

郡王以下造墳造壙等項悉照造府第事理減半價銀送府自造又冊開

蜀府墳壙民七夫匠銀如遇奏

准修造之時於所屬下班歇役民兵工食內支給其軍三夫匠一千四百四十名議免衛所派徵止將各衛所旗軍應得折鈔銀兩充支其

郡王以下民七軍三銀亦於歇役民兵工食及
軍鈔內支充解給又開

蜀府修墳軍三銀共該一萬八千二百五十三
兩有零本司先已借支發府修理未經扣還
議行合屬衛所將各旗軍歷過折色鈔銀俱
自嘉靖二十八年爲始除各照數扣充

王府修墳軍三銀兩外其餘俱充作各軍每年
應納軍器粗料之數間有應支鈔銀數少而
修墳軍三并軍器粗料數多者姑免徵解抑
或軍器粗料并修墳軍三銀少而鈔銀稍多
者亦不許請領以爲定規又查得先年

王府祿米除

蜀王位下歲支本色外各

郡王鎮輔奉國將軍鎮輔奉國中尉俱本折中
半兼支郡縣主郡縣鄉君并儀賓俱四分本
色陸分析鈔至四十四年內奉

宗藩條例一議處改折

郡王及鎮輔奉國將軍俱三分本色七分析鈔

鎮輔奉國中尉俱四分本色陸分析鈔郡縣
主鄉君及儀賓俱二分本色八分析鈔其本
折輕重之數各從彼中舊例支給又停給工
價

郡王將軍中尉郡縣主君房屋冠服墳價俱一
槩免給隨該

蜀王遵例將位下本色祿米一萬石內
奏辭一千石訖至萬曆十年內又奉

宗藩要例一酌議工價

郡王係

帝孫者儀仗房屋冠服及身後墳價俱照例全給
其餘

郡王儀仗房屋冠服止令自備不必奏
請關給身後墳價量給一半

世子墳價與

郡王同至於將軍中尉郡縣主君等房屋冠服
墳價俱一槩停免萬曆十三年內本司奉文
查得四川歲用宗祿以前

冊封者坐派各有定數本自足用嗣因

宗室蕃衍祿養漸增遂將不足之祿向於成都府廣豐廣寧二倉收貯本折民糧內動給雖係相沿舊規終非經久正法計

蜀郡王宗儀并新封共二百一十四位各支祿糧不等歲支本色米豆共二萬三百八十八石有零折色米共一萬七千二百七十二石有零該折銀一萬二千九十兩六錢有零又折鈔米折銀三千四百五十六兩二錢有零

內除折鈔於所屬徵解司庫戶口鈔銀內關支其本色少米一千八十八石有零折色少銀七千一百六十二兩六錢有零向於豐寧二倉額坐民糧本折內通融動給今應於漢州新繁等州縣改撥足數以萬曆十四年爲始另立

王糧名色照數徵解聽支呈詳批允又查得折鈔則例舊規每石折銀六分近奉部文每石折銀二分各宗苦訴該本司議將見封者照

舊六分以後新封者方行二分析給等因通
詳兩院會

題該戶部議得寶鈔原無二價改折自宜齊一
今内外文武百官由一品以至雜職折鈔皆
不過三分而惟各省

宗藩所折之數多寡不等所以科臣建議欲照
周府事例俱以二分爲率已奉

明旨允行且題例未及三載遽難議更等因題奉
聖旨該府折祿鈔銀既原與各處不同准照新例
外量加一分支給欵此欵遵移咨備案行司轉
行各道府州縣遵照去後今照四川

宗藩自改折以來在

郡王及鎮輔奉國將軍俱三分本色七分析鈔
在鎮輔奉國中尉俱四分析本色六分析鈔在
郡縣主鄉君及儀賓俱二分本色八分析鈔
其本折銀米先年額派與近來改派計筭俱
足應用業經

題議已悉無容復贅即今雖有新封增添而中

間又有事故扣減通融支給並無缺乏不煩別處至於房屋冠服等價在先年雖定議於茶稅銀內動支自奉要例裁革之後俱係自備遂將稅銀改充賞番之用亦無餘積若墳價先年雖議於軍鈔銀內兌支其實一時權宜之計亦自奉例之後止是

郡王量給一半奏有勘合至日另行議處其餘宗室並未議及以上二項價銀原非正額亦無儲貯無憑改補冊報等因到臣案查萬曆十

八年八月內准戶部咨前事該禮部題議餘祿一款戶部覆議通行有

藩封撫按官行令布政司即查嘉靖四十四年起至萬曆十七年止自議定條例之後其中所列改折宗祿裁革房屋墳價等項曾否於正額開除如未開除見作何項支用今宗糧急缺應否於此項改補及有未盡事宜不妨詳議一併造冊報部仍限本年十二月內具奏等因題奉

欽依備咨前來已經案行該司備查去後今據前
因該臣會同巡按四川監察御史李 議照
王府祿糧并房屋墳價等項節經部議斟酌改
裁據今四川宗祿自嘉靖四十四年改折以
來府倉尚有不足者向於成都豐寧二倉糧
米內湊支至萬曆十四年始將湊用之數改
撥足額另立

王糧名色徵貯聽支此原無已減之糧數則無
徵額之猶存可知已其房價冠服等銀在昔
動支茶稅自裁革之後銀改賞番一無餘積
至墳價向係權宜兌給亦從奉例後自
郡王外不之議矣二項俱非正額並無儲貯堪
改祿糧此外亦無可再議者既經該司查明
理合會疏題

請伏乞

勅下該部查議施行緣係遵奉議覆藩政竭愚衷
以裨治安及奉

欽依考成事理未敢擅便爲此具本謹題請

旨

叅罰管屯官員疏

題爲仰承

德意酌定降罰官員事例以一政體也據四川按察司管理清軍驛傳屯田茶鹽水利道副使陳文煥并據四川布政司右叅政兼按察司僉事管理建昌兵巡糧儲道周光鎬各呈報所屬衛所萬曆十三年起至十六年止掌印管屯官已未完屯糧分數冊由到臣卷查先准戶部咨內開各衛所屯糧通限當年完足

如未完二分以上管屯官住俸督催掌印官
姑免未完四分以上管屯官降俸二級掌印
官住俸各戴罪督催未完六分以上管屯官
降二級革任差操掌印官降俸二級戴罪管
事以上住俸降俸等官俱不許別項差委致
滋規避通候完至九分以上住俸者方准開
俸降俸者准復原俸未完八分以上管屯官
降二級仍調邊衛係邊衛者改調極邊衛分
俱帶俸差操掌印官降二級革任差操都司
掌印管屯官總計所屬衛所完欠分數一體
查叅以上各官如新任并署印帶管止以經
手年月扣算不得一槩偏累自後務遵此例
永爲定規又准戶部咨內開衛所屯牧錢糧
全完者紀錄未完者照例罰治又准戶部咨
內開通行各撫按官以後
題叅衛所掌印管屯各官查果屯軍消乏屯地
荒蕪糧難必完從實具

奏姑准比照有司凋疲地方事例遞爲減等降

罰等因俱題奉

欽依備咨前來節經通行遵照續據屯田道呈報
十三十四兩年徵屯官應叅由詳到臣該臣
查得十五年以後至今者併當叅究又經批
行去後今據前因覆查未完分數相同除完
至八九分以上及都司衛所管屯等官陞任
物故外臣會同巡按四川監察御史李 看
得瀘州灌縣黔江廣安鎮西五衛所印屯指
揮鎮撫千百戶內四年全完如劉鎮高應麟

揚堂孫繼勳三年全完如王繼祖趙維熊張
名譽吳承蔭一年全完如袁太和顏志禮吉
重儒趙中馬品良潘臣忠各効勤能俱應紀
錄餘若成都建昌壘溪等衛所掌印管屯指
揮千百戶等官陶克孝等通合叅懲以儆怠
玩叅照各官或職司典篆而督理不勤或責
在專屯而催徵無法均當照例處治但據屯
田道議將應住俸千戶王爵免叅應調衛指
揮千百戶瞿鎮徐民瞻王永祚止於降級帶

俸應降級指揮千百戶魯繼周張懋傳應爵
止於降俸革任應降俸百戶王符止於任俸
其先經住俸降級今復在叅罰者止從
重從一科懲及據建昌道議稱各衛連歲兵
荒苦甚內地乞將應叅各官照凋疲事例量
行遞減及要將承委採木督兵指揮李紹武
暫署印信指揮李承恩俱免降罰其原經住
俸降級各官亦從重從一論治俱已酌議詳
明應從所擬內王爵施勲歐煬盧啓四員俱

應姑免住俸李紹武李承恩二員俱應姑免
降俸陶克孝金應宗周敦吉甘祿張承祖郭
承勲王宗斌陳文將添爵王臣顧應仁萬國
寧彭從德張啓恩張繼周張文元楊宗和朱
啓孔繼祖何陞階魏應輝二十一員應住俸
王符程尚恩李繼光周福冷宗映吳國忠周
承芳七員姑住俸劉昌胤龔成陶棊三員仍
住俸各督催張元勲王必勝周繼承張承祖
耿烈于殿劉平七員應降俸二級戴罪督催

張懋魯繼周傳應爵李用景王儀五員姑降
俸二級仍革任差操劉應辰高啓嗣孫一元
陳銓曾三省五員仍降俸二級戴罪督催劉
繼文伊有光二員照今降俸二級戴罪督催
李宗裕張問仁竇縉三員應降二級革任差
操王承武趙國卿楊偉張垣李仁五員仍降
二級革任差操王永祚瞿鎮二員止降二級
徐民瞻仍降二級俱免調衛除造青冊送部
外其餘合具

題伏乞

勅下戶部再加查議將劉鎮等移咨兵部分別紀
錄陶克孝等住俸降級行臣等遵照督
催完報庶功罪昭明而人心知警屯額可足
而邊儲有資矣緣係仰承

德意酌定降罰官員事例以一政體事理未敢擅
便爲此具本謹題請

旨

請給大臣卹典疏

題爲懇乞比例請

賜卹典以光泉壤事據四川布政使司呈奉臣批
據內江縣申據本縣人官生何台恩生何合
呈稱父何起鳴由嘉靖三十八年進士除授
陝西西安府盩厔縣知縣四十三年七月選
授禮科給事中四十四年七月陞工科右給
事中四十五年四月陞戶科左給事中隆慶
元年四月陞禮科都給事中三年八月陞順

天府府丞給假回籍萬曆元年十月補太僕寺少卿三年五月陞大理寺少卿十月陞南京太僕寺卿四年四月改南京光祿寺卿五月陞都察院右僉都御史巡撫貴州七年四月陞副都御史巡撫山東九年二月陞大理寺卿四月陞工部右侍郎十年八月歷三品俸三年考滿十三年六月陞本部尚書十五年二月奏

准給假省親十六年十二月接邸報奉

旨遇缺准用又蒙巡撫四川徐都御史疏薦起用不幸丁父祥憂制哀慟傷脾於十八年十一月十八日在家病故伏觀

大明會典內一款凡文官二品見任并致仕病故者例有祭葬贈謚錄廢之典查得嘉靖年間本部尚書林廷楫在任督建

九廟

兩宮工成乞休回籍病故又本部尚書張潤在任督修

宮殿

壽宮工程致仕回籍病故俱蒙

恩賜祭葬贈謚台父事體似與相同呈乞轉申兩院會議應得

卹典請

賜全給等情到縣理合備申等因照詳奉批仰布政司查例議報奉此又蒙巡按李御史批布政司查報蒙此行准按察司并守巡川西道各咨牒及據成都府申報本宦生前立

朝居鄉事實前來該本司覆查無異所據應得卹典相應呈請兩院會

題等因到臣卷查先准禮部咨為謚卹

鉅典請乞成風懇乞

宸斷杜倖覲以昭嚮勸事該禮科署科事右給事中陳藻等題本部覆議凡大臣病故應得

卹典係在家致仕養病給假等項病故者各地方有司卽將本官履歷緣由及病故日期申報撫按衙門覈實季終類奏中間果有行業超

卓公論共推及罪過昭彰公論共棄者不妨
據實開列等因題奉

欽依備咨前來通行遵照外今據前因該臣會同
巡按四川監察御史李 看得已故原任
工部尚書何起鳴兩居撫鎮並彰保釐之勲
繼晉司空益著勤勞之勳生前屢膺

眷命歿後宜被

恩私所有本官

卹典既經該司覆查前來例應會

題伏乞

勅下禮部查例議擬上

請定奪緣係懇乞比例請

賜卹典以光泉壤事理未敢擅便為此具本謹題
請

旨

參論不職有司疏

題爲遵

旨糾劾不職有司以肅吏治事卷查萬曆十八年
七月二十二日准吏部咨爲災異頻仍隱憂
可慮懇乞

聖明亟飭吏治以弭天變以保萬世治安事該廣
西道監察御史李時孳題本部覆議恭候
命下通行各省直撫按官務遵

前旨嚴督各該司道將所屬府州縣掌印官虛心

體訪如有貪酷不謹衰庸無爲者從公開報其各該司道有年力近衰才猷未稱者一併叅奏議處本部仍定立限期載入考成四川限次年三月具奏回銷等因題奉

欽依移咨前來通行各該司道遵照將各府正佐及州縣掌印官從公考覈去後今據揭報前來該臣會同巡按四川監察御史李竊惟郡縣正官關係民生最重惟其職所貽

災禍匪輕故臣自入蜀以來首以驅逐貪殘親附百姓爲務彈章凡數上繼之巡按御史近復不時論劾一歲之內解印綬去者相望於道惟是監司職任稍崇見

上意綜覈甚切類多勉勵職業且昨歲已去二人餘尚無顯過可指容臣細加體訪隨後甄別優劣又寧越撫夷成都府通判鄒鳳儀見經臣等拏送按察司究問明實至日具

奏外訪得合州知州宋希張人同飾朽才類持

鉛墮肝膽於吏胥擁几案各出撓言日惟開
然堂上付耳目於左右每遺忘令其記稟致
滋影射蚩民牌票雜沓而新故莫知惟王天
爵詹祥吉等要行就行要止就止詞訟紛紜
而曲直罔辨惟李遠坤李遠仲等說打便打
說饒便饒應捕一名耳而白役承票者以十
數扛幫徧擾於鄉村初差一人耳而積呈添
差者至六七絡繹豈寧於鷄犬陳九雜姦占
弟婦罪至重也乃賄吏周承諫稟是此中風
俗向不成招竟召保而脫逃未結圓潔私通
許氏罪止杖也因聽吏龐繼榮妄稱僧道犯
姦只是打死果杖禁而頃刻喪生心只畏李
子霄之窩訪而衙門百事任其把持人則傳
李知州之橫行而刺史兩轡反爲虛設其他
淹禁科罰雖出羣奸誰其尸之與夫局驕指
詭已若罔聞民胥讒矣此一臣者骨血糊塗
衣冠土木僅無自作之孽緣當筮仕之初所
當姑照不及例降調閑散者也重慶府通判

岳一崙氣體尪羸病形沉痼刑名不諳羣胥
徒倚爲奸緝捕無方夥盜縱橫罔忌長壽等
邑寇報時聞矣豈其以歲荒之故可置不問
乎而禁戢勘鞫曾未展手一籌張克仁等獲
盜賣放矣豈其招滿貫之贓情尚可原乎而
入杖出徒殊藐視乎三尺似此專職之已曠
矧復視篆之多尤纒至涪州遽追罰贖羅知
州之歸囊是助曰鄉里之去吾故念之也乃
饑民賑貸則付之彭水武隆冀得以因人成

事而不恤入城守候之難薛世魁之通詳招
申曰驛丞之善吾與揚之也乃廳阜隨行則
用之行杖領牌一任其假虎作威而致有冤
民擊鼓之訴李渡去州城一舍耳鹽徒敵殺
官兵旣不能覺而更聽王州判撥置強回護
以飾其非正霞告正湖一僧耳蹇登索受杯
盤旣不能防而仍聽張祥等攬毆斷回俗而
逼之死給各行物價膠曰時估實每兩有二
錢之虧索鹽票紙紅名曰公堂乃一張有二

錢之納署印已及數月而前官羅奎名職尚
列於文移受狀不論日期而吏書陳在動等
恣意於抽壓此一臣者賄賂事少闕筭處多
臥蓐日多據案時少所當照有疾例勒令致
仕者也彰明縣知縣曾一中程才最劣視履
甚汙日在醉夢之中而大小事權半皆旁落
人有風漢之號而上下文牘任其陸沉索京
債者如市則借貸於部民胡元相龐若訥陳
三策等銀或百兩或五十兩輒萌賂削償補

之思責新負者盈門則屬意於衙門阜隸門
子鋪兵等工食或全扣或半扣不顧穿窬竊
取之恥追徵大糧三千兩每兩索三分秤頭
李葵韓棟等之言盈於道路更換夫馬六十
名每名索二錢見面楊斌陸韶等之口誰可
隄防糴穀以濟川東非得已也乃官價二錢
五分剋去六分胡以免怨谷於穀戶轉餉以
給松茂至勞力也乃腳價一兩四錢剋去一
錢曾何念苦辛於窮民跳踈無常手拔犯人

之髮刑罰不可望中矣而斯民手足之無措
何以堪之淫蕩不檢戲挑寄獄之娼威儀已
不足觀矣而一方風俗之無主不可憂乎此
一臣者蔑視官箴漸無人理所當照不謹例
革職閑住者也伏乞

勅下吏部再加查訪如果臣等所言不謬將知州
宋希張降調閑散通判岳一崙致仕知縣曾
一中革職閑住庶劣吏旣汰而民生獲蘇矣
緣係遵

旨糾劾不職有司以肅吏治事理未敢擅便爲此
具本謹題請

旨

甄別清屯官員疏

題爲清查拋荒屯田以裕軍儲并議久任責成
以臻實效事據四川布政使司呈奉巡撫李
都御史批據四川按察司管理清軍驛傳屯
田鹽茶水利道副使陳文煥呈稱萬曆拾捌
年捌月內該本道看得衛所屯田荒蕪弊端
已久雖屢行申飭乃荒蕪猶然勢豪官舍包
占轉佃爲奸衛所雜差騷擾爲害以故軍民
人等多不樂從領種卽有種者或畏避差役

之苦隨領隨拋額餉大虧屯政隳廢聽本道
親自巡歷地方督同屯坐州縣正官將荒田
盡數查出召無田軍人或民間有力願領種
者給帖執照耕種候三年起科衛所衙門再
有派擾雜差者許屯丁赴告以憑究治間有
近河衝塌止有一半耕種即以見在計筭召
墾其餘量行豁減不必拘定原額務在刻期
召完仍明立文案取具屯頭鄰佑并結久遠
爲業不得限滿復行拋荒如有此等卽於屯

頭鄰佑名下追納三年花利其各州縣正官
能極力幹濟召墾全完者官以稱職備呈兩
院紀錄優獎如闕茸怠惰支吾塞責及衛所
管屯官不行盡心清查延捱觀望者一體叅
懲至於各府掌印官均有督理之責卽據各
州縣召墾之多寡以爲該府殿最等因通詳
奉撫院批屯田墾荒事宜依行各該有司衛
所官著實遵行多方召墾仍廉其真心任事
及怠玩支吾者分別開報以憑獎錄叅處該

道亦須巡行躬督摘弊釐奸用臻實效此繳
又蒙巡按李御史批屯政久敝非極力振刷
輒難脩舉據議責成各官殊中肯綮查有關
茸玩愒延捱觀望不行實心任事者卽指實
叅呈以憑處分俱依議行繳蒙此卷查本道
於本年三月內閱得邸報內一本爲屯政久
敝額餉大虧乞

勅當事之臣實心經理以佐邊費事該戶部覆議
戶科都給事中王繼光題前事恭候

命下仍咨各邊巡撫都御史及咨都察院轉行北
直隸屯田御史及各省巡按御史督同各道
分查所屬某衛原額屯地若干額糧若干今
失額若干明白出示凡有前項侵奪占種影
射者許各自首還官不必追咎其既往除不
堪種者另行議處外其堪種田畝聽各道隨
宜召撫開墾仍蠲三年之租三年以外止征
見稅不許追及舊欠每年終撫按官將各墾
過田畝分別殿最覈實具

奏冊報部科查考等因題奉

欽依緣本道奉有屯田專責節經備行各府州轉行屯坐州縣會同各管屯官將拋荒屯田盡數查出勒限召人開墾并巡歷各該地方督同各州縣官曉諭所在軍民定以起科年限及刊刻簡明告示徧發張掛據崇慶新津等州縣冊報前來猶恐虛應本道仍親歷覆覈其承領者俱已開墾佈種未經承領者驗果坐落山亢委難開耕今總計拋荒屯田共一

千伍百參拾餘分計畝該糧玖千肆百餘石內除水衝無存并難以開耕捌拾餘分計畝該糧肆百玖拾餘石外實墾過荒田壹千肆百伍拾餘分計畝該糧捌千玖百捌拾餘石爲照蜀中屯田俱係沃壤節年因屯官擾害以致軍民畏懼拋棄不種歲復壹歲荒蕪日多今蒙兩院軫念軍儲重計督行開墾而又念其敝壞之久風勵鼓舞本道得藉奉行每巡行所至進官民於庭示以勸懲定以期限

淳淳開諭俾遐陬下邑洞然知其有利而無
害以此次第承領開耕蓋自肆月間以部議
通行歷夏秋冬至今窮寒時之力始獲就緒
各該有司官員容本道於賢否冊中分別註
考具報及照本道所屬屯田自萬曆拾貳年
奉例丈攤原報部額糧共貳拾叁萬玖千柒
拾玖石肆斗玖升今止見徵貳拾貳萬玖千
陸百石有奇較之前數稍有不同今將召墾
田畝糧數造冊乞批布政司再加酌議覆呈

等因照詳奉批仰布政司覆議詳報奉此又
蒙按院批布政司酌議確當詳奪蒙此隨奉
撫院批據該道呈爲墾荒事竣酌議未盡事
宜以圖經久以飭屯政事條議徵屯糧置循
環杜爭端清色占禁白役伍款由詳奉批仰
布政司會同按都貳司及在省該道覆議詳
報奉此又蒙按院批同前事蒙批各款俱於
屯政大有裨益布政司會同按都貳司及在
省各道再加酌議妥確詳奪蒙此又奉兩院

牌行本司將該道督墾屯田務要覆覈的實
竝召墾勤能怠玩應獎應罰有司衛所等官
敘議詳報奉此俱備行各屯坐州縣開造冊
揭及取具甘結前來竝移行該道將責成墾
田各官備開職名到司該本司署印分守上
川南道右叅政武尚耕會同按察司按察使
陳薦分巡川西道副使鄭人達都司軍政掌
印署都指揮僉事阮維藩議照本省拋荒屯
田已成廢墜頃承兩院督行該道盡數查出

勒限開墾未及壹年業已就緒查得拾貳年
奉例丈攤報部該道分管衛所屯田共叁萬
玖千伍百捌拾貳分花菌壹千玖百叁拾捌
所共計畝該糧貳拾叁萬玖千柒拾玖石肆
斗玖升伍合捌勺壹撮捌圭壹粒叁粟止見
徵屯田花園叁萬玖千玖百捌拾分半計畝
該糧貳拾貳萬玖千陸百石叁升柒合貳勺
肆抄壹撮貳圭伍粒柒粟今以原冊開報及
續行各州縣覆覈清出田糧一併計算拋荒

屯田壹千伍百叁拾玖分半計畝該糧玖千肆百柒拾玖石肆斗伍升捌合伍勺陸抄伍圭伍粒陸粟內除水衝無存并難以開耕屯田捌拾伍分計畝該糧肆百玖拾肆石伍斗玖升陸合柒勺伍抄柒撮實墾過拋荒屯田壹千肆百伍拾肆分半計畝該糧捌千玖百捌拾肆石捌斗陸升壹合捌勺叁撮伍圭伍粒陸粟共召過軍民壹千捌百伍拾餘戶其開墾田糧照例蠲叁年之稅候至貳拾壹年

秋成之後限滿至貳拾貳年方行起科至於水衝并難以開耕屯糧暫行停徵以俟將來漸次開墾復額所據當事各官如副使陳文煥實心任事銳意除奸功績最多所當紀錄成都府知府詹思謙義勤率屬心切裕儲計所屬州縣開墾數多應候兩院定註最考各該有司衛所等官除額荒不多雖墾難以言勞及接管未久與陞遷去任俱免議獎戒外查得邛州知州盧宗華雙流縣知縣王曰然

安縣知縣曹鎧新都縣知縣邵年齊什邡縣
知縣姚廷臣新繁縣知縣孫思述灌縣知縣
羅樹聲德陽縣知縣莊自勉彭山縣知縣張
萬春高縣知縣楊汝翼新津縣署印崇慶州
判官劉澤演彭縣署印華陽縣儒學教諭俞
咨益以上各官多方勸相極力調停心計甚
周勤能備至相應獎勵新津縣典史吳一誠
承委心力俱竭督耕幹理有條併應獎勵又
查得崇慶州知州梁岳政體雅稱長厚開荒
殊覺逡巡成都前衛千戶彭應年中衛百戶
傅應爵屯事乃其本務奉文未見經心以上
各官俱應量行戒治及將該道條議伍事逐
款登答造冊呈詳到臣簿查先據該道呈議
開墾荒田已經批行清理冊報前來覆批該
司酌議及牌行將召墾勤惰各官敘議併報
去後今據前因該臣會同巡按四川監察御
史李議照益州沃野類多膏腴兵食所資
營田為急節因豪右侵占因而影射加之丁

苦雜差每多逃竄遂致屯畝拋荒屯糧失額
政歸廢墜其來久矣今該道銳意清查躬巡
郡邑僅歷冬時遂告竣事承墾者壹千捌百
伍拾餘家復額者捌千玖百捌拾餘石止有
水衝無存及難以開耕者肆百玖拾餘石以
俟漸墾計所未復實數僅貳拾分之壹耳至
於談道條議未盡事宜以圖經久款款明確
鑿鑿可行又下司道覆議惟在著實脩舉無
容別議其成都府知府詹思謙督屬勤勞委
應准註最考以俟優異知州等官盧宗華等
壹拾參員奉檄心勤營田績茂臣等已徑行
獎勵知州等官梁岳等參員量行示戒俱無
煩瀆

請仍將召墾過田糧造冊送部科外看得四川按
察司屯田道副使陳文煥器識明瑩才猷敏
練清拋荒而躬履遐僻人絕影射之奸督召
墾而盡闢荒蕪儲有充盈之漸足稱績最理

合

題旌伏乞

勅下該部再加查議如果臣等所言不謬將副使陳文煥紀錄優擢以勸勤勞再照屯政之廢興由人力之勤惰有司分任其責該道獨總其成今田之荒者業墾矣額之失者業清矣然必限以叁年而後起科故起科之日然後田為熟而墾有效也顧叁年之內墾田有司陞者去者不已過半乎使繼之者非人前功隳矣顧獨該道可歲時巡行阡陌課其成功

也若不久任責成何以克臻實效副使陳文煥向者家食甚久昨起原官以來復歷俸貳年計其遷轉之候當亦非遙自為臣屬朝夕相接其人之丰采政事臣居京久知之自臣入鎮後愈益賢之蓋文煥之品格才華將來端可大受不特今能其官也臣謂宜加叅政兼僉事銜仍管原道事務以竟其績為便蓋臣於屬官知之頗真竊謂賢能久任為吏治最要若久任而不加銜恐有賢愚同滯之嘆

也惟

陛下裁察焉緣係清查拋荒屯田以裕軍儲并議
久任責成以臻官員效事理未敢擅便爲此且
本謹

題請

旨

叅罰徵糧官員疏

題為仰承

德意酌定降罰官員事例以一政體事據四川布
政使司呈報萬曆拾柒年分合屬府州縣夏
稅秋糧額辦雜派等項并帶徵拾肆年己未
完錢糧內除蠲免全完并完至捌玖分以上
及停徵者於拾捌年帶徵外未完柒分以上
長壽縣署印忠州判官陳邦珽本縣知縣儲
登選管糧縣丞易天文未完肆分以上巴縣

署印重慶府推官李時華知縣項應祥署印
本府同知張守訓知縣許安國管糧主簿賀
象江津縣知縣張宗載署印主簿安師光管
糧縣丞張邦憲未完貳分以上合江縣知縣
張良遇以上各官催徵怠忽例應查叅但四
川稅糧每年俱於拾月一併徵收計各經管
月日見任推官李時華調任知縣項應祥行
取知縣張宗載丁憂判官陳邦珽各接管之
時尚未起徵見任同知張守訓僅止半月俱

難緊累知縣儲登選許安國各已物故縣丞
易天文主簿賀象安師光各已革職知縣張
良遇被叅革任通應免究止有見任縣丞張
邦憲例該叅治等因冊由到臣卷查先准戶
部咨內開一應起運各項本折錢糧每年備
造各官職名并到任年月日期與不完分數
應叅

奏者叅

奏具造冊籍貳本一送本部一送該科又准戶

部咨內開以後州縣見徵起運各項錢糧俱
要當年盡數完報以前年分拖欠帶徵者每
年限完貳分如掌印管糧官催徵怠玩即以
帶徵應完貳分并見徵年分全數總計以拾
分爲率未完貳分以上住俸督催未完肆分
以上降俸貳級戴罪督催其住俸降俸等官
雖遇行取陞遷俱不准起送通候完至玖分
以上住俸者方准開俸降俸者准復原俸未
完陸分以上各降貳級起送吏部調用未完
捌分以上俱革職爲民其司府掌印管糧官
總計所屬州縣完欠分數一體查叅以上各
官如新任并署印帶管止以經手年月扣算
不得一槩偏累又准戶部咨爲敬陳未議以
備

采擇以裨治安事該戶科都給事中蕭彥題本部
覆議行各省直撫按官以後年分查各府州
縣掌印管糧官員見年錢糧依限全完者優
獎至捌分者免叅不及捌分者照舊例叅罰

又准戶部咨內開以後年終查叅催糧不及分數官員除致仕革職物故外其陞遷丁憂去任者果係經管日淺方准議免其餘照例追論不許故縱又准戶部咨內開各省直撫按官轉行所屬將拾陸年見徵錢糧務要盡數督催如期完報止帶徵拾伍年欠數其拾肆年拖欠於拾柒年帶徵不許一併催科以致小民難於措辦等因俱題奉

欽依先後備咨前來通行遵照在卷今據前因覆查未完分數相同除完至捌玖分以上并不如數州縣物故被論去任等官及署管時原未起徵與經管日少外該臣會同巡按四川監察御史李議照江津縣管糧縣丞張邦憲司督催之責之勤屬之秉成額旣虧

明罰奚違所當叅治用儆將來伏乞

勅下該部再加查議將張邦憲照例降俸戴罪督催其各縣未完錢糧聽接管各掌印管糧官照數帶徵完報庶職官知勉而歲計有裨矣

除造冊送部科外緣係仰承

德意酌定降罰官員事例以一政體事理未敢擅
便爲此具本謹題請

旨

查叅失獄官員疏

題爲強犯越獄查叅失事官員以儆怠玩事據
分守川東帶管兵巡下川東道四川布政使
司左叅議丁此呂呈問得犯人陳應元年貳
拾歲夔州府新寧縣人見叅本縣刑房典吏
招稱萬曆拾柒年貳月內本縣蕭知縣大察
去任蒙議委東鄉縣儒學段教諭至縣署管
印務本年捌月內本縣捕獲別卷照拏今越
獄脫逃強犯陳伯璿陳仲元到縣監候申報

一併不

毛鳳

川

小

訖拾捌年貳月內蒙段教諭將陳伯璿陳仲元審擬強盜得財各斬罪肘鎖監候招解間比在官禁子陳有仕劉希禹各不合受賄縱容陳伯璿陳仲元在監寬鬆肘鎖以致貳犯與今脫逃擊獲另結強犯王嘉友密約欲行脫監王嘉友就將伊妻送入鐵槍頭壹箇放在囚牀傍邊以備挖牆本月貳拾陸日應元不合不赴提牢託故告假回家夾在官書手戴果不合代為點視本日夜四更時分陳伯

璿陳仲元王嘉友各探得獄卒兵夫俱已睡熟用前槍頭剜落牀板將牆脚挖開壹孔逃出越過西門城牆奔走訖貳拾柒日早陳有仕等醒覺稟縣隨差兵快緝拏不獲本月內段教諭具辭印詳由申道蒙將本縣印務議呈兩院批委夔州府蔡推官署管段教諭將陳伯璿等越獄情由令應元具文申報間因蔡推官將至交代應元又不合耽延不即申報參月初參日蔡推官至縣接印出示緝捕

一面於初陸日具由通報隨蒙分守帶管兵
巡道丁叅議批行夔州府查究失事員役勒
限捕拏如過限不獲徑行叅究又蒙督撫李
都御史批據申該縣獄囚於貳月貳拾陸日
脫監因何日久方報仰兵巡下川東道嚴行
四路緝拏限半月內盡獲一面將經該失事
印捕各員役據實招叅詳奪又蒙巡按傅御
史批兵巡下川東道嚴緝究報蒙道牌行本
府提究間有本縣民王辛前往開縣拏獲王

嘉友於叁月初陸日送赴新寧縣審出前情
將本犯監候申報本道訖蒙府署印高通判
催行蔡推官提解應元等到府鞠究前情明
的將陳有仕劉希禹各問擬受財故縱至死
絞罪陳應元不覺失囚減等徒罪戴果等各
不應杖罪看得署印教諭段逵新寧縣補盜
主簿胡廷美俱屬踈虞合併叅究等因招詳
帶管本道丁叅議查得禁子陳有仕劉希禹
受賄未有定數應駁府勘確另招其教諭段

達主簿胡廷美俱應住俸緝拏如過限不獲
另議招奪陳應元等各照原擬招詳到臣簿
查先據新寧縣署印夔州府推官蔡宗憲申
報前事已經批仰該道查究去後今據前因
除批行外臣查得問刑條例內開府州縣掌
印巡捕官但有死罪重囚越獄參名以上俱
住俸戴罪緝拏限參箇月以裏有能盡數拏
獲者免罪等因看得獄禁一事關係匪輕臣
祇奉

明例節行申飭不啻再三迺新寧有此疎虞且復
遷緩申罪法應參治用儆將來該臣會同巡
按四川監察御史李 參照新寧縣署印
東鄉縣儒學教諭段達權縮邑符遽出押虎
典守宜執其咎稽延是誰之愆新寧縣捕盜
主簿胡廷美因踰城而弗覺其未議察之嚴
賊有跡而未擒益徵玩偷之態於例俱應住
俸戴罪緝拏但段達已解印務督捕無權似
當重加罰治胡廷美照例住俸緝拏務在得

獲仍行接管掌印官嚴督員役以結前案惟復別

賜定奪伏乞

勅下都察院再加查議覆

請施行緣係強犯越獄查叅失事官員以儆怠玩事理未敢擅便為此具本謹題請

音

叅究稽遲勘合疏

題為查議銷繳魚課勘合事據四川布政使司呈問完犯官譚孔仁原任四川成都府資陽縣知縣今奉文改教招稱四川通省額辦并新增魚課云云蒙本司看得課銀係濟邊急需而勘合乃奏繳重務前此隸之屬下遵行廢馳自萬曆捌年戶部題奉

欽依改行本司歲終類報無非歸一事體慎重封

章之意為轄屬者自當恪遵成議砥礪奉行
却乃視為泛常玩愒如故若非往歲照發勘
合因而詰查終為寢閣所據節年經承官吏
法當分別究治除事故離任官員應照律條
在任犯罪去任事發笞杖以上勿論外今將
故違見任官員及有罪該吏人役一併具招
其知州萬輝等應聽叅治等因到臣卷查先
准戶部咨前事該本部題內開魚課俱係額
辦錢糧或解太倉銀庫濟邊或留本處支用

祖宗立法編發勘合年終

進繳比對查考立法至善永當遵守但近來有
司官吏遵依繳報者十無一二未繳者十之
八九原發勘合本部既無簿可查其怠玩官
員又無憑叅究且州縣各另差人

奏繳計應納正課鈔不過數錠銀不過數兩而
往返費用指稱科派每處不下五六十金相
應酌議本部移咨各省直巡撫都御史及咨
都察院轉行各該巡按御史通行所屬司府

州縣自萬曆捌年為始將發到魚課勘合查其辦過寶鈔數目若干如已填完勘合隸布政司者徑申送布政司隸府州者徑申送本府本州每年終類總具

奏永為遵守若有過限不繳及所屬仍舊徑自差人

瀆奏指稱科擾者即將故違官吏問罪發落責限完銷等因題奉

聖旨是欽此備咨前來已行該司通行所屬府州

縣遵照去後今據前因覆查各該官員除已遇

宥及事故離任者委於律得勿論其改教知縣譚孔仁及見任知縣祿有政等并吏書段朝德等應照原題

欽依問罪發落事理批行納贖還職還役發落外及照知州萬輝等係在外伍品文職土官楊應龍係宣慰俱擅難徑擬應合叅治該臣會同巡按四川監察御史傳 叅照綿州知州

萬輝達州知州周仕楷巴州知州顏若愚蓬
州知州陳其志心存怠緩政帑及於魚鹽事
屬稽遲法應逮之金矢播州宣慰司宣慰使
楊應龍扞我疆圉罔思法網之嚴私爾澤梁
豈顧

公家之利且詭言以相誑充蠢性之可嗤縱旣
往之不追宜將來之時

獻伏乞

勅下該部再加查議覆

請將知州萬輝等行巡按御史提問如律宣慰使
楊應龍念係邊籬姑免窮索倘後仍前拖欠
定當置之科條庶額課無虧而邊需攸濟矣
緣係查議銷繳魚課勘合事理未敢擅便為
此具本謹題請

旨